



**ATASSUT**

**UPA 2017/65**

**Mala Høyt Kúko**

**17. Maj 2017**

**Tasiilami timmisartunut suluusalinnut mittarfissap ingerlatseqatigiiffiup suliassanut ilaaqqullugu Kalaallit Airport A/S-mut nalunaaruteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Justus Hansen, Demokraatit)

Inatsiartunut ilaasortaq Justus Hansen Demokraatit-neersoq Tasiilami timmisartunut suluusalinnut mittarfissap ingerlatseqatigiiffiup suliassanut ilaaqqullugu Kalaallit Airport A/S-mut nalunaaruteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuuteqarneranut imatut ATASSUT-miit oqaaseqassaagut.

Ippassaq ataasinngornermi tugassiuutitigut tusartinneqarpugut Tasiilami mittarfiliornissamik Naalakkersuisut unitsitsisimasut. Kiisalu aamma Kujataani mittarfiliornissamik aamma sumiiffissaata inissisimanissaannik tusagassiuutit nalunaarutigivaat. Aamma ullaq manna sermitsiami paasitinneqarpugut mittarfittaarnissamigoq suliaq ingerlavoq.

Ila tupannarlunilu ajuusaarnaraluassusia taamatut Tasiilami mittarfissamik pilersaarummik kinguarsaaniarneq. Uffalu ulluni kingullerni maani inersuarmi, ukiuni kingullernilu tusartuaripput tunumi innuttaasunik ajornartorsiutit qanoq annertutigisut. Ippassaq aallakaatinneqarpoq Nuuk tv-mi tunumi innuttaasut Kalaallit nunatsinni tunumi innuttaasut pigissaanngitsut amerlaqisut, Kalaallit nunatsinni piitsuunersaasutut inissisimasuusut. Suliffissaaleqineq qassissaami tusartualeraluarnerparput tunumi annerpaartaasoq, tamassuma oqaatigineqartuarnera qanormitaava isikkoqalerpat aatsaat pimoorussamik tiguneqarumaarnerpa qullersaninngaaniit.

Sanaartornermut ataatsimiititaliaq ukioq januarimi qallunaat nunaanni angalavoq. Angalanermi peqataavunga, pulaakkatta ilagivaat Copenhagen economics, pulaakkatsinni apersuivugut soorunalimi paaserusutatsinnik. Paaserusutatta ilagivaat Kalaallit Nunatsinni mittarfinnik

sanaartorniarnermi sumi akilersinnaanerunersut. Nassuiaanneqarpugut seqersitsitsisaatikkut Qaqortumi mittarfissaq akilersinnaangitsumik ingerlanneqartussaasoq. Soormiuna taamatut? Tassa atorfilittat siunnersuisarnerat kukkusumik ingerlasarmat taamatut politikkerit aalajangiisarput, akineqarpugut. Tamannalu dk-mi aamma takussaasartoq nassuiaassutigivaat. Tasiilamut mittarfiliornissamik kinguaarsanermik aalajangiisoqaqqissappat eqqaamaneqassooq kingunissaa tunumiut nammagaannut oqimaareertigisunut suli aamma oqimaanninngoqqittussaassammat.

Ineriartornermik peqataatinneqanngikkutta mittarfiliornerni, mittarfiit kitaani sananeqartut naammassippata suli aamma annermik aningaasartuutit ineriartornerup nassataanik atorfissaqartinneqartussat takkuteqqikkumaassapput. Taamanikkussamullu ineriartornerup pingaartitsinera aallaavigalugu aalajangiunneqaqqikkumaassavoq illoqarfinni innuttat amerliartortut pinerullugit. Tamasuma nassatareqqikkumaarpaa tassa illoqarfiit allat inukinnerit ineriartortinneqannginnissaannik.

Assersuutigalugu Nuuk ukiut 15-it qaangiuppata innuttaasut marloriaatinngorsimanissaat taggiunneqarnikuuvoq, taamanikkussamut eqqartulereerneqarsimassaaq mittarfissaq siunissami tulluuttoq sumiissaneranik. Tassami Nuuk-mi mittarfik timmisartunut annernut miffigineqarsinnaanera akunnassereersimasussaassammat.

Taamaammat takullaqqunarpoq Tunu Islandimut qanittuaraararsuuvoq, Canadaminngaaniit qaninnerusoq aningaasarpassuarnillu isaatitsisoqarnissaanik ilimanaateqarluartuusoq. Islandimilu ukiuni kingullerni turistit tikittartut sukkanerpaamik amerliartupiloorput sulilu aamma amerliartungaatsiarlutik.

Naalackersusuisut Tasiilamut mittarfittaarnissamik kinguarsaanissaannik aalajangeeqqissappata paasinarnerusimassagaluarpoq Island-i tunuminngaaniit ungasissumi inissisimasuugaluarpat. Naalackersuisut kinguarsaanermik iliuseqaqqissagaluarpata paasinarnerusimassagaluarpoq turistit Islandimut tikerartut amerliartorsimasuunngikkaluarpata. Kinguarsaaniarnermik iliuseqaqqissappat paasinarnerusimassagaluarpoq Island-ermiut aningaasatigut ukiut ikittunnguit masuma siornatigut ajutoorujussuarnermikkut, aningaasarpassuit akiligassariligaat akilersimangittuugaluarpassuk. Kisiannili pissutsit illua tungaani sammimmata ATASSUT-miit paasiuminaatsissavarput naalackersuisooqatigiit aalajangiusseqqikkaluarpata.

ATASSUT-minngaaniit ernumassutigivarput naalackersuisooqatigiit kinguarsaanermik ilioqqikkaluarpata tunumi innuttaasunik qimarratilerannik tassa illoqarfinnut anginernut kinguneqartitsilerumaarnissaa. Ullutsinnimi kinguaariit nutaat periarfissat inuuniarnikkut pitsaannerusut oqinnerusorlu ugartortuurtuummassuk .

ATASSUT-miit ilisimaarivarput politikkikkut piumassuseqaraanni sunaluunniit aalajangiussaq allangortinneqarsinnaasoq, tamannami takoreerparput naalackersuisooqatigiinnitta nalaani tuaviortumik aalajangiisarnerit, mittarfissani sananissamik angumersiniarnerit, avatangiisinut tunngasortaannik piumasaqaataasunik suliaqartut ulapitserujussuarlugit.

Naalackersuisooqatigiit kaammattussavassi, mittarfittaarnissamik suliaq sukkatserusukkussiuk tamanna ilissinni aalajangerneqarsinnaavoq periarfissaqarpoq . Tunumiut innuttai ukiuni arlaqartuni ineriartormik kinguussaaqqanikuupput Kalaallit nunatta kitaaanut sanilliullugu, massakkut taamatut iliuuseqarneri allangortinngikkussiuk suli ukiuni arlalinni tunumiut kinguussaanissaat ATASSUT-miit ernumassutigaarput.

Taamatut ATASSUT-miit naatsumik oqaaseqarluta Justus Hansen-ip siunnersuutaa taperserlugu ataatsimiititalianut susassaqartunut ingerlateqqinneqarnissaanik kissaassivugut.

Qujanaq!